

誠意伯劉先生文集覆瓿集卷之十四

覆瓿拾遺

古賦

通天臺賦

井序

昔漢武帝元封二年作通天臺于雲陽亦一時之奇  
觀也相如已死無能賦者乃擬而為之其辭曰

惟漢五世握乾統坤三十有二載文教赫乎有截威武  
振乎八裔於是乎萬方來同四夷嚮風靡民不寧無神  
不宗天子乃駕六龍乘輕雷訪王子于緹山邀安期於  
東萊泰山封号碣石開宣防塞号萬福來乃立通天之  
臺臺延列仙于太虛運巧思于孫卿發脫卒于温舒景



雍土之高明得軒轅之闕立後六丁以屏功鑿坤輿以  
承跌下刻峭以削成兮上辨華而紛敷屹屹兮似不周  
之天柱挺挺兮若閩風之瑤圃轟鴻濛以建標兮拖甘  
泉以為祛日月縈繞於中央兮雷霆鬱律而在下俯太  
微之連珠兮見華嶽其如馬雲霧起于太半兮激倒景  
而成虹攀帝車而陟三階兮平步閣道而入紫宮建畢  
昂以為梁兮縈銀河以為帶覽九州于一目兮游氛却  
而清氣會爾乃命方士集玉童脯文麟灸輕鴻揚太一  
之靈旗撞碧玉之華鐘萬舞波動百神景從奏承雲兮  
發咸池獻三嬪兮矯兩龍合六律兮齊八佾美要妙兮  
靈感通樂具九奏神交五精紅光下照輝如流星歛塵

揮忽電掣而焱集兮皓鶴瞻晶天輝而日晶方象載之  
穆流兮伏燭陰以承衡蜚陳寶使先驅兮曳旌頭以為  
旌緘阿舒徐而按節兮飛廉游揚而不驚於是萬姓盱  
盱使者肅肅竿籟戢音鳥獸跼伏風縱縱以扶輪兮雲  
霏霏而蒙轂爾乃鏗蒲牢舉神燿聲砰隱于穹窿兮燎  
炆煜以燭漢於是乘輿乃升竹宮展巖裡老聃相禮后  
變正倫張九光之華鐙列羽葆以行陳登降有數拜起  
有秩八神雍穆而順序千官端儼其如一精誠交乎上  
下不二祀事既虔天瑞乃至泰山宵呼白雲晝媚露落  
仙掌芝生洞房灑銅盤以如飴擢九莖而夜光蓬萊致  
如瓜之棗玄洲獻不死之香神筵周而復始與天地同



久長於是天子乃冕然而思湛然而疑曰予否德曷致  
休徵將天以民為子而王者代天以理苟能以天心為  
心天胡為而不喜往者南征北伐東狩西巡雖曰順天  
以行道能不運衆而勞民廼命謁者省四方賑貧窮察  
饑荒寒者與之衣餒者周其糧六官罷文繡之飾上林  
閑射獵之場老羸無負戴之勞幼穉絕天殛之傷巨天  
所覆莫不熙皞皞戴帝德於唐虞也遂作頌曰  
於玉臺兮赫通天不日成之黔走先燹綿綿兮穆上玄  
太一貺兮輝光負拜竹宮兮熙恪虔蕃祉衍兮德澤宣  
人神和兮皇億年

古樂府

女兒子

女兒二六月上弦嬌羞長在阿婆邊阿婆惜愛女兒子  
女兒只愁阿婆死

古詩

題蘭雀圖

有雀有雀亦集于棘無啄我蘭空林多風霜露其溥婉  
彼孤芳克貞以完無俾荒蕪以永歲寒有雀有雀亦集  
于棘無啄我蕙空林多風雨雪有曠婉彼孤芳克貞弗  
替無俾荒蕪以永終歲

感懷

昊天厭秦德瑞氣生芒碭入閔封府庫約法唯三章英



雄不世出智勇安可當叔孫一豎儒綿蕞興朝綱遂令  
漢禮樂遠媿周與商逝者如飄風盛時安得常寤寐增  
永歎感慨心內傷

四月陽用事群物咸長榮靡草雖就死王瓜亦復生死  
生誰所致時致莫能爭聖人洞神理守分無外營脩身  
俟天命萬古全其名

自都回至通州寄普達世理原理二首

旦辭文明門回首望宮闕長雲擁蓬萊烟霧中滄鬱相  
去不崇朝杳若隔溟渤扁舟指吳雲離夢縈燕月雖懷  
歸鄉歡復愴知己別裁詩寄悠悠感念深至骨  
西風吹青冥征鴻暮蕭蕭一辭都門去便覺京國遙輕

霜入秋鬢落英整寒條念我同年友高誼薄九霄恨我  
處遐遠不得陪晨朝綿綿久要心萬里匪為遼鱸鮒赴  
清淵孔翠依蘭若飛潛各有適今得無外徼佇立望閭  
闔傾耳聆簫韶

晚至草平驛

落日照阡陌秔稻生清香好風自西來吹我征衣裳但  
惜景物佳不覺道路長嵩禽歸蒙茸馬足響康莊驛吏  
迎我前拜跪進酒漿要我入山館左右華鎧光解鞍待  
升月星明樹蒼蒼

送僧家奴參政赴河東宣慰使

晨登晉陽山西北望雲中大漠造瀚海重關阻飛鴻昔



為征戍場今見車軌同相公奉明詔分符總元戎賦詩  
聯行雲坐肅生長風霜濃曙角清月出黃河空細草卧  
牧馬虎服齟孤弓天子萬歲壽壽壽拱明光宮

發安谿至青田戎事急不得留有感

鷄鳴戒晨裝掛席日尚早風亂沙上雲雨昏江中島士  
生從王事薄質非所寶但懼筋力微任重躋遠道昔邁  
園柳青今來江楓老對君互戒沒憂虞何時了朝原思  
春今夜船夢萱草寸步隔河山愁馬傷懷抱

天壽節同諸寓臣拜于寶林教寺禮畢登槃翠

軒分韻得稽字

宿雨霽初晴山翠如洗流霞絢琳宇旭日射丹檠鳥

鍾超梵宮焚香望天陞遙遙蜂螳忱惓惓葵藿禮萬年  
主壽長百拜臣首稽竣事陟華軒敦情屬芳醴大師祇  
園英聰明實神啓諸公俱俊髦文藻壓班禰肅雍周簋  
簋古恠夏追蠡鹿鳴歌苹蒿魚麗詠魴鱧劍氣星有輝  
珠光海無底嘉會非尋常令德更豈弟澄心映空曠滌  
慮俯清泚看竹風泠泠折花露泥泥紆餘睇溟瀛緬邈  
想淮濟巍巍世皇業喬嶽深根祇螳蝦亢齊斧碎首堪  
立後農郊卜甘歲已喜先抽薜曾樓睇北極祥光應周  
髀中山致麩蘖東吳來秫米宴醑迄有期玉缸浮盎醞

題蘭花圖

亭亭石上竹嫋嫋竹下蘭歲晚各自媚不知霜露寒欲



持贈君子路永江海寬空山日搖落佇立起長歎

正月一日公宴分韻得恩字

青陽肇嘉歲白日回春温起視天宇間粲然生意存高  
堂建華盖北面朝至尊彤雲暎扶桑條風吹我幡鳴弦  
在兩楹旨酒盈金樽轅門號令肅主將詩書敦彬彬衆  
多士矯矯鳳與鸞廟筭得其長豺狼安足吞揆子實砥  
硃深慙烈與璠敢矜鉛刀割所望安黎元恢復舊土疆  
以酬生育恩

題王元章梅花圖

會稽老王拙且癡能畫梅花稱絕奇春牕走筆生古恠  
中有窈窕傾城姿人生得閑真是好得閑不閑惟此老

有梅在長不梳一生只被梅花惱天生梅竹可無  
爾梅有花結不成世間花實總尤物不如畫  
枯榮

琴歌贈劉元明

龍門獨樹冰壅弦空林響清  
離鸞怨啼風滿天碧潭殷雷龍起蟄月落太陰山鬼泣  
湘江秋水一劍明帝子歸來聞佩聲扶桑浪翻竭石改  
東海魚飛入西海白雲去盡天茫茫十二玉樓深夜涼

二鬼

憶昔盤古初開天地時以土為肉石為骨水為血脉天  
為皮崑崙為頭顱江海為骨髓高岳為背脊其外四岳



為四肢四肢百骸咸定位乃以日月為兩眼循環照燭  
 三百六十骨節八萬四千毛竅勿使淫邪發洩生瘡疥  
 兩眼相逐走不歇天帝憇其勞逸不調生病患申命守  
 以兩鬼名曰結璘與鬱儀鬱儀手捉三足老鴉脚踏  
 中蟠九螭咀嚼五色若木英華上界已老陸離朝  
 賜金樞清晨還上扶桑夜為扶海若慈  
 沸滾煎魚龜燿煌焜耀  
 上在廣寒生樹根漱  
 藥跳上蟾蜍替春  
 搗手搗桂樹子撒入大海中  
 石谷關化作瑜珣琪入拾得與

官各職職惟有两鬼兩眼晝夜長相追有物來掩犯两  
 鬼隨即揮刀鉞禁制蝦蟇與老鴉低頭屏氣服役使不  
 敢起意為奸欺天帝怜兩鬼暫放兩鬼人間娛一鬼乘  
 白狗走向織女黃姑磯植河鼓塞兩旗跳下皇初平牧  
 羊群烹羊食肉口吻流膏脂却入天台山呼龍喚虎聽  
 指麾東岩鑿石取金卵西岩掘土求瓊巖岩訇洞砉石  
 梁折驚起五百羅漢半夜撥刺衝天飛一鬼乘白豕從  
 以青羊青兔赤鼠兒便從閣道出西清入少微浴咸池  
 身騎青田鶴去採青田芝仙都赤城三十六洞主騎鸞  
 翳鳳來陪隨神魁清唱毛女和長烟裊裊飄熊旂蜚廉  
 吹笙虎擊筑罔象出舞奔馮夷兩鬼自從天上別別後



道阻隔不得相聞知忽聞韓山子往來說因依兩鬼  
各借問始知相去近不遠何得不一相見叙情詞情詞  
不得叙焉得不相思相思人間五十年未抵天上五十  
炊忽然宇宙變差異六月落雪冰天遠龍鬣上山作窟  
穴蛇頭生角角有岐鱈魚掉尾斫折巨鰲脚蓬萊宮倒  
水沒楣攙搶枉矢爭出逞妖怪或大如甕盎或長如蛟  
蛇光燦燦形躩躩叫鹿豕呼熊羆煽吳回翔魑魍天帝  
左右無扶持蚊蟲蚤蠅蚋蜚嗜膚啞血圖飽肥擾擾  
不可揮筋節解折两眼瞠不辨妍與媸兩鬼大惕傷身  
受榜管便欲相約討藥吊天帝鑿先去两眼睛使試  
白黑便下天潢天一水洗滌盤古腸胃心腎

肺脾取女媧所搏黃土塊改換耳目口鼻牙舌眉然  
後請軒轅邀伏羲風后力牧老龍言泰山稽命魯般詔  
工倕使豐隆役黔羸礪斧鑿具鑪鉞取金尊收伐材尾  
箕修理南極北極樞幹運太陰太陽機檄召皇地示部  
署岳瀆神受約天皇墀生鳥必鳳凰勿生梟和鴟生獸  
必麒麟勿生豺與狸生鱗必龍鯉勿生蛇與蠚生甲必  
龜具勿生螭與蜃生木必松楠生草必薺葵勿生鈎吻  
含毒斷人腸勿生枳棘覃利傷人肌螟蝗害禾稼必絕  
其蜈蚣虎狼妨畜牧必遏其孕孽啓迪天下蠢蠢氓悉  
蹈禮義尊父師奉事周文公魯仲尼曾子與孔子思敬  
習書易禮樂春秋詩履正直屏邪敵引頑嚚入規矩雍



雍熙熙不凍不飢避刑遠罪趨祥棋謀之不能行不意  
天帝錯怪恚謂此是我所當為眇眇末兩鬼何敢越尔  
生思惟嗷嗷向瘖盲洩漏造化微急詔飛天神王與我  
捉此兩鬼拘囚之勿使在人寰做出妖怪奇飛天神王  
得天帝詔立召五百夜叉帶金繩將鉄網尋踪逐跡莫  
放兩鬼走逸入嶮巖五百夜叉箇箇口吐火搜天刮地  
走不疲吹風放火烈山谷不問杉栢檟檟蘭艾蒿芷蕪  
茅茨燔煖熨灼無餘遺搜到九萬九千九百九十九仞  
崩谷底捉住兩鬼眼睛光活如琉璃養在銀絲鉄柵內  
衣以文采食以麋莫教突出籠絡外踏折地軸傾天  
兩鬼亦自相顧咲但得不寒不餓長樂無憂

待天帝息怒解猜惑依舊天上作伴同遊戲

堅心石

我髮今已白我心今尚赤我有一雙翼墮地數千尺地  
府不敢收化作堅心石

題墨竹

風梢舞空烟露葉滴晴月折取寄情人感此歲寒節

五言律詩

四月十二日發揚州

幾見明月滿猶嗟行路難時平耻無用身賤敢偷安天  
地山河闊風沙道路寒旅人元有淚不必雍門彈

濟州太白樓



小逕迂行客危樓舍酒星河分洗水碧天倚嶧山青  
代空文藻斯人竟斷萍登臨無賀老誰弟共忘形

送僧家奴叅政赴河東宣慰使 二首

雲中形勝地閑塞接天長白草連沙漠黃河入晉陽老  
臣持節鉞大閫壯金湯昭代思賢佐須公在廟堂  
大閫諸藩上元戎朔漠間天低馬邑塞河入鴈門闕落  
日旌旗靜高風堡障閑旬宣推碩望喜色上龍顏

送人赴德清稅

鏡湖木葉落震澤水波生鳧鴈衝人起笙歌送客行盃  
津魚鼓集棗屋繭絲明王稅隨時足吟賦待太平

題釣雪圖

雪暗洲渚白江清蒲柳寒悠揚隻短棹汗漫一漁竿忽  
憶冷浪曲因悲行路難蛟鼉正驕恣還為爾長歎

特曉

愁夢不更續寒天將欲明雪風吹海樹霜月凜江城衰  
病丹心在難虞素髮盈殷勤東注水渺渺若為情

五言絕句

題梅屏二絕

樹杪過流星輕霜落半庭疎花與孤客相對一青燈  
獨酌梅花下憐花與鬢同折花還插鬢顛倒吹東風

七言絕句

過園關



天上絲綸啓玉封，聲雷動八州。同閩江渺渺通炎海，  
添作恩波到日東。

題竹木石圖 二首

凌霜傲雪無人問，拂水拖雲意自閑。願就姮娥借明月，  
臥看鸞鳳舞空山。

古木攏森傍水隈，鳳凰飛去不飛回。披烟細看蒼筤葉，  
知是湘君淚濕來。

題蟹 二首

殼鬪犀函手鬪兵，沙提潮落可橫行。稻根香軟蘆根美，  
未覺江山酒興生。

擁劍橫行氣象豪，渾疑繡素是波濤。能令吻角流饒沫，

莫向窓前咤老饕。食

題枯木圖

幹排風雨三千尺，根老冰泉八百年。不用江頭喚元緒，  
何妨湖上識神仙。

題陳太初畫扇

炎天玉爍水銀流，琴上薰風可解憂。不負吾皇麟趾意，  
只今誰是富民侯。

詠史

姦雄盜竊是傾危，只道冥冥便可欺。想得民心思漢日，  
正當揚子劇秦時。

遣興



一炷清香一卷書此身安處是吾廬綠槐翠栢宜長日  
門外何須長者車

七言律詩

感興

赤城霞氣接天台上界仙宮此地開滄海有波容蝦鱈  
石梁無路入莓苔當時玉帳耽羅綺今日絲綸到草萊  
傳語疲氓聊忍待王師早晚日邊來

發嶧縣至上虞道中作

磴骨泥深去馬遲雪殘青嶂不多時荒烟蔓草中郎宅  
素石清谿烈婦祠日落風生臨水樹野寒雲濕度江旗  
宣光事業存書史北望淒涼有所思

次韻和謙上人秋興一首

山雲滿地起秋濤涼葉驚風下几臯藥籠空聞收馬勃  
絃歌豈復用牛刀草間孤兔營三窟天上龍彪昧六韜  
周漢中興還有日載歌亦伏詠嵩高

聞高郵納款漫成口號

聞道高郵已徹圍却愁淮甸未全歸聖朝雅重懷柔策  
諸將當知虜掠非堯帝封疆元蕩蕩世皇功業甚巍巍  
忠臣義士同休戚縱欲尋安總禍機

春興

近聞丹詔出天闈聖主鳴謙下土知豈意豺狼猶桀黠  
未隨干羽格庭墀四郊多壘忠臣耻百戰無前壯士規



寄語總戎熊虎將莫教長媿伐檀詩

再用韻答嚴衍二上人

負郭無田生事踈微官已謝不須除散愁漫入高僧舍  
乘興還過野老居草冷蟲聲悲杆軸霜餘蕉葉碎緘書  
黃花素髮相將暮獨立淒涼憶往初

六用韻答嚴上人

中夜登樓望紫微北辰不動衆星依由來赤日行黃道  
多事玄雲變白衣雪下蓬萊三島隔濤翻滄海萬魚飛  
聖君宵旰惟恭已早晚陽和斡化機

次韻和孟伯真感興詩

避難移家適遠鄉憂時一夜百回腸徒聞鉄甲連戎壘

未覩鉤車踰賊隍不共班超爭食肉欲尋木羽學休糧  
磨崖可勒中興頌努力諸公佐有唐

妙成觀用何逸林通判韻

我訪仙家溽暑前青楓綠柳暗晴川竹根露濕登山屐  
沙際鷗迎渡水船雲氣長留虛白室丹光直上蔚藍天  
純陽道士重來日為問蓬萊是那邊

得胡仲淵書歡喜成詩奉呈石末公兼簡三益軍諮

故人忽寄一封書愁眼還明病亦無風滿高林歸猛虎  
月涼古冢散妖狐大廷職貢當遄復戎馬資糧不再輸  
更喜元侯契天意良苗得雨應時蘇

次韻和石末公秋日感懷見寄二首



郊原如赭已無孳况復干戈未肯休肉食不知田野事  
布衣深為廟廊憂典章淪落悲芻狗餽餉倭遲想木牛  
札樂將軍今卻殺豺狼滿地待虔劉

秋陰竟日似黃昏夏旱良苗不半存敢望魚雞充醢醢  
尚期菘菹作饔飧烟塵慘澹黃公石雲氣蒼茫紫極垣  
作檝濟川須傳說九閔虎豹向誰論

重陽日使者持詔用韻東石末公

中元悲斷義和報九日歡迎詔使來紫禁羽林分壘壁  
清秋辰極照中台頓從黃石明三略莫使詩人賦七哀  
蟻蛭牛溲休沸渭泰山喬嶽甚巖嵬

夜坐有懷呈石末公

丑風白露下清寒山岸柳江蒲取次凋諸將旌麾非一統  
大藩衣服變三苗雄豪竊據皆屠狗功業興臺總續貂  
藥馬誰知懷故捩天涯涕淚北辰遙

次韻荅石末公傷用三苗之作

周用羗髡功有赫唐通回鶻禍無訾幽歌鄭曲非同調  
楚服秦驂實背馳安得着鞭先祖逖趨陪前蹕學鉞期  
扶持聖主中興業整頓乾坤去詭隨

石末公家人自台州來以詩問之

委羽山前海水飛赤城霞色亂斜暉過庭且喜諸郎至  
懷上休嗟舊業違李晟孤軍終獨捷杜魯百戰竟安歸  
丈夫事主心如石去殺勝殘自有機



次韻歲菊

風霜搖落與傷神，黃菊於予意自親。  
遲莫長存君子操，淒涼不厭主人貧。  
天虛沆瀣流清氣，月過青冥動細倫。  
此夜空庭耿相對，春花夏葉總埃塵。

次韻和石末公歲除送窮之作

五夜雪霜清沴氣，三陽玉燭照芳春。  
願聞馴象來林邑，復覩封牛至廚賓。  
川石山示爭效職，淮夷海獠悉歸臣。  
君王垂拱明光殿，聖敬如湯日日新。

次韻和石末公春晴詩

幽禽嘖嘖語朝陽，細綠駸駸入女桑。  
天上深宮調玉燭，人間和氣應勾芒。  
赤眉青犢終何在，白馬黃巾莫漫狂。

將帥如林頃發維，太平功業望蕭張。

次韻石末公題桃源卷

菴花逐水紫紆入，不覺清溪路淺深。  
執手問名驚見面，論新話舊各傷心。  
壺漿餽餉殮加辟，館穀溫存贈有金。  
似此情懷良匪惡，何嗟歲月去駸尋。

再次韻時閏九月九日菊

秋來有菊即重陽，曷問他鄉與故鄉。  
愁見飛蓬垂雪領，笑牽落蓋入霞觴。  
陶時莫訝逢餘閏，遣興聊圖不永傷。  
歲晚移根深記取，勿令紅紫閨中黃。

再用前韻頌菊

天遣幽花駐蜀陽，移根應自白雲鄉。  
釀成甘谷千年液，



滿泛瑤臺百寶觴人老容顏猶可返歲寒霜雪復何堪  
得時無用空妖冶愧死姚家宮樣黃

次韻和石末公聞有詔使不至

祈招旦夕動避心疾首西歸望好音鳳下丹霄雲杳杳  
魚飛碧海霧沉沉徒言雨露無私潤誰謂陽和未溥臨  
何日六師能電掃周原依舊載馳驅

和石末公冬暖

總謂浮雲解作霖豈期雲氣漫成陰何人真辨頻瞻印  
有客悲歌歎毒淫項帝權移天曷定神龍用亢海徒深  
掩身未服先賢訓向日空懷小炒心

望江亭

柳拂江亭舊畫欄望潮人去地應閑寢園寂寞秋風裏  
行殿荒涼野草間白塔盡銷龍虎氣荒城空鎖鳳凰山  
興亡莫問前朝事江水東流去不還

白塔寺

物換星移事已迷從來此地感東西可憐如鏡中<sub>作</sub>天  
月獨照城烏夜夜啼

序記

送謝教授序

士有急於用世者非苟為利祿計也少而學壯而啟行  
之不得一命則抱材而無所施古之人皇皇焉出疆必  
載質夫豈苟而然哉今之由學校掌出內為儒官循次



待用至得一教授亦難矣教授名九品職而不得與民  
事故謂之冷官繇是以達于縣府然後得行其所志壯  
日去而老及之矣如之何其不皇皇也謝君仲連教授  
于杭期未及三年計餘月無所用即飛書趣代至則長  
揖出門外若馳峻坂就平陸若蒼鷹脫鞴條而乘長風  
也夫以仲連之才固宜取科第以早施其用乃屢試而  
不偶卒就學官以進抑天將多其所歷以大其成乎豈  
人之行止各有其途而係乎數者然也譬之順流江河  
以入海其行有遲速及其造則一耳天門洞開多士輻  
輳有志於用世者維其時矣故於君之行序以壯之

送三寶柱郎中之徐州兵馬指揮序

皇朝混一九有狡多鞞劔七十有餘載近者河溢齊魯  
飢氓聚為盜賊吏民生長寔安所至弗禦故盜日益狂  
數年之間乍伏乍動所司莫能制朝廷深惟黔首之情  
乃立兵馬指揮于徐州選大臣之有謀德威信者為之  
辛酉進士江浙行省郎中三寶柱與焉命下眾皆歎服  
公拜命就道江浙士庶且喜公之見知于朝廷而又戚  
不得留公于行省也相與餞公于杭北門外咸依依不  
忍別儒學副提舉劉基作而言曰夫感恩懷惠私情也  
為國安民大事也山東為天下要害地盜不可使久聚  
公之化行于青徐青徐天下皆安公之在彼不多於在此  
乎眾悅又執爵而言曰夫民猶水也水性之就下猶民



之秉彛而好德也激而躍壘而突繼之而不知其所底  
非其情也抑亦有以致之哉方今天朝豈無龍韜之士  
挽弓六鈞袖椎百二十斤者哉乃弗使而於進士乎取  
吾君之意深且遠矣公其敬辭之哉公曰諾遂酌酒以  
為別至正辛卯二月日序

送錢士能之建昌知州序

往時予與錢君士能同日辟掾江西行省故其交為最  
厚歲餘士能與幕官論事不合拂衣去未幾余亦以朽  
鈍辭歸不得見者九年矣乃今年十月遇于杭予以從  
仕即為儒學副提舉又以疾謝事而士能以奉議大夫  
為建昌知州方之官大夫士之工詞章者咸賦詩以為

餞俾子存焉夫士能與予同以職官充簿書役又同以  
事辭其出處甚類而九年之間相去越五等何懸絕耶  
今既見而喜喜而思語故舊則悽以悲又自慶其相逢  
于未老而俱無恙也夫物之生患不得其所性射于處  
于曾噬而截菴茂于陂池不以所不願易其所願今士  
能以長才方為世用而余之朽且鈍愈加於昔日天將  
全之俾各獲其志則一進而一止豈不俱洋洋也哉勉  
哉士能知者勞之愚者安之予亦有賴於君矣

送順師住持瑞巖寺序

予嘗聞浮屠氏言大穢跡金剛事云佛既涅槃西方西  
方之鬼謂佛已寂滅天下不復有佛佛弟子無足畏因



悉起為蠶佛之法且大壞佛遂化其身為金剛藍色鑿齒出入無有中咋群鬼食飲其肉血鬼乃大惕請命願改過為佛弟子佛法由是不壞今其呪語猶存所謂大穢跡金剛是也予舊聞人言佛以慈悲為道能開閻曹拔死苦轉惡為善聞見患難無不救今又聞佛能以武猛服魔鬼聖人曰仁者必有勇豈不信哉辛卯之歲盜賊起西方明年予奉省檄佐城浙東聞永嘉有橫舟和尚善用矛戟弓弩刀劍戈槊擗挺通曲制官道主用之法因禮致于台時天寧寺住持舜田方宣力扞城蚤夜不忘賊賊見則大喜舉以主其仙居三學寺又明年方氏納款請降允以兵事進者措弗用而有司敬和尚之德能復以其教舉為瑞巖寺長老瑞岩之僧徒聞和尚名亦大喜將行請予言予懼世之惰者不知佛之有勇而惑為佛法者之不當究武事故為大道穢跡金剛以發其蒙焉

喜雨詩序

同知副都元帥石末公再鎮括之明年威行惠敷茲暴日鑠其夏五月禾黍既藝天乃不雨民大憂懼公遂致齋穆禱于麗山之祠得雨未沛越翌日命道士設醮于玄妙觀是日大雨明日又雨又明日乃大雨至夜分民大喜皆拜公賜予時奉省檄在括目覩其事因喜而為詩以歌大夫君子咸屬和焉季君山甫衷而集之又俾



子序其故惟公之功在括甚大而於此見公之心焉書曰惟德動天又曰至誠感神矧茲有苗戡亂致治屯在是矣能無喜乎

唱和集序

古人有言曰君子居廟堂則憂其民處江湖則憂其君夫人之有心不能如土瓦木石之塊然也禹思天下有溺者由己溺之纓思天下有飢者由己飢之伊尹思天下有一夫之不獲則心愧耻若撻子市是皆以天下為己憂而卒遂其志故見諸行事而不形於言若其發而為歌詩流而為詠歎則必其有所沉埋抑挫鬱不得展故假是以據其懷豈得已哉是故文王有拘幽之操孔子

有將歸之引聖人不能免也故曰在心為志發言為詩先王採而陳之以觀民風達下情其所繫者不小矣故祭公謀父賦祈招以感穆王穆王早寤焉周室賴以不壞詩之力也是故家父之誦寺人之章仲尼咸取焉縱不能救當時之失而亦可以垂戒警于後世夫豈徒哉故漆室一女子也倚楹而歎憂動魯國而况於委質為臣者哉予至正十六年以承旨檄與元帥石末公謀括寇因為詩相往來凡有所感輒形諸篇雖不得達諸大廷以託君子之心而亦豈敢以疏遠自外而忘君臣之情義也哉昔者屈原去楚離騷乃作千載之下誦其辭而不惻然者人知其不忠也覽者幸無謂焉萬一得附警



師之口以感上聽則亦豈為無補哉

諭旣括父老文

告旣括父老皇朝以武德一九有服而不殺燠休滋潤  
罔有荼毒至今八十餘年矣父老目不覩旌旗耳不聆  
鈺鼓茹蔬飯稻哺孫育子早臥晏起優優坦坦通無貳  
有蹈山涉水不覩不類誰之賜歟帝德寬大務在休息  
與百姓安樂太平故禁網漏而弗脩官缺其人偷惰潛  
生以不能宣德化達壅滯咎在有司非主上意也今父  
老子弟不察其故懟暑嗟寒徒怨于天乘間造讒竊弄  
戈兵睚眦跳踉曼及炒木禽獸率遏厥生所過所止山  
夷土赤甚亡謂也百姓無辜顛蹙于天驚動天心天子

乃其左丞相曰其從便宜死之生之無倚無頗丞相  
於念小民謂不教而誅有辜帝仁詢于庶言知使者父  
老鄉里姻戚與父老故無惡為能奉揚朝廷仁恩以啓  
迪父老心不遂傷是用發傳俾使者來喻父老冀父老  
各體上意約束其子弟變極作福以活乃胤屬俾引勿  
割惠至渥也今使者至郡且彌月矣布告已至而父老  
子弟猶豫未決使者實愚朴不能測人意而嘗聞大君  
子之教曰惠迪從違吉凶猶影響火生于木厥惟自灼  
匹夫不可讎况敢觸天子丞相怒乎大命不借大恩不  
再怨可釋不可結亂可久不可長冥行弗返厥途乃窮  
易曰不遠復無祗悔不吉又曰迷復凶父老念哉語曰



日不失其親亦可宗也使者雖微丞相命也惟父老審圖之無自失取時以貽悔莫及

慶元路新城碑

上嗣位之二十年詔浙東道肅政廉訪使納麟路刺以中奉大夫為浙東都元帥適海寇再叛之明年浙東帥府治慶元慶元與台州鄰寇發台之黃岩與慶元相密通守臣議治城以防不測衆口聒聒弗克定公至召屬吏庭喻之曰重門擊柝以待暴客制也戒國家以武德一九有弛城郭弗葺以示歸馬放牛之意至今七十有餘年天下不見金革可謂安且久矣吾聞窮則變變則通易道也聖人作易以前民用愚者可與樂成而不可

與慮始平世之人溺於安安解不以苟且從事平居論是非哓哓風后力牧不能高一且變起倉卒則手足無所措以至墮身名離骨肉而不自悟者不少矣夫以佚道使民雖勞不怨吾將佚之怨何憐焉無就遜言以速咎也衆應曰諾乃命有司序民產高下以差其役輕重先豪右大姓沙門道士以及干齊民斥監督吏勿用先事者有賞後至則加勸勉無罰民大敬服無敢慢時故城久廢室其址者數百家公命悉徙處官地發廩粟以助不給民忘其徙凡六月而城成周十有八里高丈有八尺上環列驛曉機弓弩礮石建楯戟羅戈梨旁開六門門有樓周廬百九千有二簡戍卒晝夜嚴警不怠西



南二方舊各有水門皆緻而新之東門去江遠則鑿其  
外為隍北門因江為隍則築堤以扞之凡所設施罔不  
中度未幾而江東浙西諸郡皆以無城郭失守衆咸賴  
公之猷為莫不樂其佚而遺其勞於是郡之大夫上及  
庶人俱請勒石頌公德且曰公之惠不獨於吾身而施  
及吾子若孫世世有所依倚迺以狀白于劉基俾為之  
文基惟慶元為浙東大府六郡之榦也榦強則枝葉有  
所附則斯城之完不獨可為斬人賀而六郡咸嘉賴焉  
公之功不大矣哉公蒙古珊竹台氏字惟仁自始仕至  
于今政績之在民不可悉數茲獨誌其治城之事故述  
鄞作人之情而系以詩曰於皇有元受命于天武定文

守以洽八埏八埏蕩蕩無此疆彼界仁池禮垣式廓無  
外陰陽迴幹寒暑往來隨時之義亦曰大哉溥彼藩邦  
猗于海壖蛟蛇巴象雨肅風騫帝命有赫元臣是臨用  
壯我戎公克協帝心鄞城未築鼉鼉走陸鄞城孔完烏  
化為鳶大府既雄侯甸以寧民曰嗚呼維公之成我有  
家室公實金之我有毒螫公實蠲之樹棗萃蒹藝麻滄  
滄濤波不洶宵寐不悚鄞人拜手公壽如山公拜稽首  
天子萬年

台州路新修城濠碑

皇元誕受天命際乾極坤邑不臣妾民蕃物豐兵刃銷  
戢官吏守文人習于娛孽種竊茁蔓于草萊皇帝惠閱



下民乃熙德禪政振八廢官大簡守令以代撫懷維台為  
州東南薄海海上之寇實生自台廼延訪千一二大臣  
擇可監是郡者以行宣政院判李顏忽都前倅密川監  
中興鹽城二縣皆以顏繼開又奏績最下  
遂簡用焉君受命為江浙行省左丞  
畏明年中書參知政事公受命為江浙行省左丞  
領海右征討事寇聞兵旦至即納款行省乞降公遂改  
受命與江南行臺侍御史資善公同察便宜招諭二公  
既至寇乃卒降上于朝未報其年夏六月大雨水溢城  
陔且半衆議謂築城以防寇今寇既條為民城當且勿  
脩君乃躋其老于庭謂之曰來女衆我聞欲逸也

遺厥艱乃逸詩不云乎迨天之未陰雨徹彼桑土綢繆  
牖戶今女下民或敢侮予女往迫于艱牖戶以充乃  
居弗咎草竊茲究豈惟海隅女其監于饒微杭常無偷  
小廉以大乃勞維女自底厥尤我之弗告維我罪民未  
克喻君曰嗚呼慢藏誨盜藩決弗治虎窺其官服功不  
于時後舉惟艱豫乃後用殄乃戚我不固女遣茲惟女  
居我其以女子孫安衆寤咸應曰諾君遂率其人往視  
升自西門循北山降于東湖故雉堞皆錯朽壤其旁涂  
又隘隱病走趨不得成列立命乃塞缺完堦闢櫺崇陋  
紫石埴土弥以赭炭竣外而坦中憑高而臨卑凡周九  
百五十丈而與故城會于東湖之濬築二亭六樓以休



偃邏卒亭依城傍樓迥出城上秋八月城成乃浚濠以  
洩水導湖自東門至于交禮橋南入于江堰其首以過  
潮汐凡長五百二十丈廣五尺深如廣而三倍焉於是  
高有據下有防水至可淪弗壅城益以堅邦人始莫不  
大悅感使君之惠又敬使君之知為政也初君之興是  
役也稱民產以均其功出官藏以助其寡縣賞以勵其  
趨事豪右無所避吏胥無所私故不擾而集既竣事父  
老請紀其績乃叙其實而系以詩曰維台為城控帶海  
湄地瘠人儉俗敦書詩在昔太平維曰易治牧臣迷亦  
貪以煩之刻木弄文化為為鵝激水之躍騰于日月  
播田野究師滿達將臣家深其其印印也作也

以娛帝念庶黎簡賢于畸僉曰臣都有守有為昔試邑  
州視民如兒繼僉臬司薙姦如茨庶其克承敷施惠威  
帝曰女都徃敬爾儀我民我子女懷女綏無怒維教休  
予至慈都拜稽首敢不肅祗夕受詔命朝乘以馳募兵  
調食如營家私誓清侵氛復命陞墀帝憐無辜恐胥以  
罹誕命元臣轉殺為滋聖恩如天皞皞熙熙古帝唐虞  
家稷人夔重門待暴豈曰敢墮立政維艱即功維機儻  
事迪茲咎由失時匪曰克斷孰完永規屹屹崇墉實鞏  
實基洛洛通渠載順有歸滔天曷畏草竊何窺厥榦既  
強式暢乃支惠此柔良以訛獷蚩台人曰吁允矣休茲  
使君之成我民之禧祝我使君壽考以祺揚于大庭熙



帝之肇昭哉勿忘勒此銘碑

慶州分元帥府同知副都元帥石末公德政碑頌  
至正十六年春季春月九日子自杭歸至慶慶父老率其子弟遮道言分元帥府同知副都元帥石末公政德曰往微公吾聚已為墟今微公吾屬已為蕘生我者天而活者公君其知乎子曰然如父老言夏五月豪酋既來納款父老又率其子弟造于庭言曰石末公邦家之干城庶民之父母也父母鞠子罔不殫厥誠厥子雖冥亦鮮不念腹育恩實由中惟公有大造于我州肆我民誕軫恤于心曰曷以報公願績公像于祠且勒石紀公功用示于州人子子孫孫俾勿忘請為之文予謝弗能父

老進曰君以丞相命布宣天子德威既揚于遠人旌庸錄勲當不憚為石末公惠安我民不伐不矜君實知之鑒于庶言式克有徵達丞相心以勸後人時惟至公子弗敢辭乃叙其實而繼以文謹按公姓石末氏名某舊為契丹人其先御史大夫以黑軍助太祖皇帝開國滅金為大勲臣有傳在史官四世祖昭毅大將軍事世祖皇帝受命南伐克襄樊有功定爵三品為沿海萬戶佩虎符鎮慶慶由是居江南好讀書工文章元統中襲爵鎮守慶州大得軍民心居數歲以爵讓于弟而退慶天台山中至正十二年福建妖賊入慶之龍泉慶慶大震憲司趣起公領征討事公至龍泉募鄉兵擊賊走之未



幾賊復入慶元公進屯查田使人購其徒為應賊遂撓  
敗公乘勝掩擊俘斬千計遂復慶元進攻建寧之松溪  
政和皆克之慶州平公乃還歸天台十四年海賊復叛  
行省憲司又以副元帥起公分府台州公辞不得已乃  
命鄉民作保伍團結扼要害使賊不敢輒登岸乃聚糧  
訓兵以圖進討其夏六月朝廷用舊議立海道巡防所  
以官賊賊乃復請降帥其屬往衛漕運至京師而妖人  
黃草堂復扇動黃岩民以報讎為名聚眾搆亂公以計  
收其渠首六人斬之餘黨皆散為民台州平行者又檄  
公分府慶州時慶之屬縣皆有賊松陽遂昌在上游去  
郡最近冬十月公帥師進討至寶定而黃壇賊大出焚

民居火照山谷公分兵守寶定自將麾下還城而賊已  
薄河津欲渡先是沿海軍悉發往江東城中留者不滿  
數百人又大半老弱公夜部分居民丁壯出拒戰斬不  
用命者三人眾乃齊奮賊止不敢渡時沿海軍有自江  
東逃歸者六十餘人公召謂曰女輩能破賊吾當原女  
罪皆拜曰諾即遣渡水擊賊賊敗走明日退去慶州舊  
有城後壞不脩遺趾蕪沒無捍蔽故百姓尤恟懼會經  
人又叛從賊焚發之永康及台之仙居於是慶州四面  
戒嚴乃議浚湟築城而官倉庫盡書晝夜經畫勸勉商  
賈大家和集其小民俾効力於國從無違審勢相方  
商工度材公悉親之官吏左右無容私焉由是雖勞而



無怨者義兵部長吳成帥衆討縉雲賊中途不進乃大掠民財以歸謀亂城中公測知其意即召與計事縛斬之併捕其黨則皆授兵給號將作矣民大驚以為神十有二月公所募義士合擊松陽賊大破之殺其酋餘衆乞降松陽遂昌悉平今予以行省掾與公同議招揖事比至而公處置已各得其當因悉遵公行於是七縣豪首相繼納款公之力也人謂公生太平時與縉紳為文墨交游彬彬然儒者也及其臨遇事變則智勇奮發運不失機撫循士民則仁慈豈弟惠無不及可謂有用之奇才矣觀其鎮一州未及朞月而功效若是使得制方而專且久盜賊何足平哉予既敬公德又重父老

是述輿情而頌之美既往以期將來也頌曰  
維木在山愈久弥長維德在人愈遠弥光公載世勲來鎮有方佩符桓桓出師泱泱謀先鬼神雷行電翔鎗旗所指百怪走藏既剪我棘爰固我疆風雨我廬公樹之墻雪霜我膚公被之裳晨昏起居婦拜兒跽有聚弗睽公賜溥將民愚而靈群祝孔祥祝公于天錫公壽昌如川源源如岳蔣蔣於千億年悠哉勿忘

季氏湖山義塾記

青田之山其上四十里有泉漚而為潭繇潭入谷十有五里是為高湖之源其上多奇峰絕巖大木之所盤蔚獻奇納秀故士多俊彥室常殷阜季氏其一也有名謙



字伯益者好學尚義故其家日裕迺謂其人曰人孰不  
愛其子孫而不知所以愛之者今有良田美宅綿亘阡  
陌堆金積帛充斥梁棟自以為用之不竭享之無窮也  
一旦光銷影鑠而無纖芥之留者何耶驕淫生於富溢  
而從欲敗度之子常由不寤前人成敗之跡而自視侈  
然大也及其顛連困厄於垂老之際彷徨無所容其身  
雖歆效織蒲補履以食其餘年且不可得若是者雖其  
人之不肖抑亦其父兄處之不得其道也今予幸藉先  
人餘業以自免於凍餒未嘗不揣揣於吾身况能保於  
其子孫故願制產以建讀書之所延名儒為師以訓子  
弟以及族端之人咸所知學大則脩身齊家以用於時

小亦不失為鄉里之善士不亦可乎迺築于其居之側  
以為堂中設孔子像旁列齋舍翼以廊廡繚以周垣買  
田若干畝以給師弟子之食萃其族之子弟悉入學者  
於是襟佩衣裳肅肅有容弦誦之音藹藹旁達人其鄉  
者莫不感歎而慕悅也嗚呼若季氏者真知愛其子孫  
哉由是達于一鄉一邑以播于天下使人人聞而效其  
所為則將見比屋皆為賢士大夫而愚不肖者寡矣邑  
人洪應求道其事於予且請為之記予既樂鄉里之善  
人而又嘉洪生之樂道入善也故喜而書之至正十年  
庚寅夏五月記

至順癸酉會試春秋義



荆人來聘。楚屈完來盟于師。楚使宜申來獻捷。楚使椒來聘。

春秋待中國之變於夷者嘉其慕義而罪其猾夏所以與人之為善而懲人之怙惡也夫荆楚中國之變於夷者也我莊公之二十三年來聘而以人書者以其能慕義而聘魯也僖公四年來盟于師而書其大夫者以其能服義而後齊也是皆所以與之也自是而後楚日以強至僖二十一年之獻捷而稱人以使者非與之也惡其恃強而猾夏也迨夫文九年之使椒來聘書其君之爵其臣之名視夫二十三年之來聘均為與之而書法有異者則以其始見于經與夫寢強於後之不同也嗚呼楚也僻處于荆山荊狐棘矢以共王事筆路藍縷以啓山林我莊公之十年始以敗蔡書十四年以入蔡書十六年以伐鄭書彼其懷封豕長蛇之心以荐食上國者未有紀極也况敢望其敬共幣帛以脩聘於秉禮之邦乎又敢望其刑牲詔神以從惠於諸侯之會乎一旦思善悔過向慕中華而來聘於我聖人以其禮義之交好甚愈於干戈之相尋也於是進而人之與人為善之德宏矣及齊桓之伐楚而次於恇也屈完實來將服齊而求盟也問昭王之不復則諱責包茅之不貢則諾微與同好則承以寡君之願語其戰攻則對以用力之難於此見其有悔罪之心有服義之善春秋書曰楚屈完



東盟于師則與之者至矣天禍中國齊桓即世宋襄嗣與不知安夏攘夷之義而來諸侯於楚盟鹿會孟開門延盜遂使楚執宋公以伐宋為魯侯不從於伐宋也而使宜申獻捷以震恐魯國聖人安得而不深惡之乎是故稱人以使抑其暴也甚矣書名著其強也不曰來獻宋捷為魯諱也盟宋以后楚使不通於魯者十不四年至文九年之使檄來聘則楚人之再聘於魯也是役也視夫來聘於莊者無以異較之獻捷於僖者為不同於是爵其君而名其臣遂斥中國無以異則進之而又進也噫春秋謹華夷之辨楚則中國之變於夷者故上不使與諸華等下亦不使與夷伙均來則嘉其慕義而接

之以禮去則罪其猾夏而滅之以刑聖人之情見矣嘗反復而攷之荆自莊公十年始見於經繼是入蔡伐鄭皆以号舉獨二十三年之來聘乃以人書故知春秋之與之也二十八年之伐鄭渡以号舉至僖元年伐鄭則改書楚而稱人者非與之也所以著其寢強也明年侵鄭又明年伐鄭次陘之師為是而起屈完來盟而稱名氏則豈非以其能服義而從齊乎然而完不稱使是其美獨在完而不在楚子此聖人之特筆也自是楚人不敢窺中國者八年至僖十一年而始伐黃十二年滅黃十五年伐徐而敗婁林十九年之盟齊二十年之伐隨二十一年之盟鹿上莫不然而書人至二十一年之



秋會于孟而書子於陳蔡之上者非與之也所以著其  
大張也宜申楚之大夫微捷而稱使是楚子使之也名  
大夫而人其君故春秋之貶人也明年之戰泓二十三  
年之伐陳二十五年之圍陳二十六年之伐宋二十七  
年之圍宋二十八年之救衛而戰城濮以至文三年之  
圍江九年之伐鄭皆以人書者即敗蔡入蔡之書荆也  
狼淵起師而后有來聘之舉晉君少懦而不恤國事大  
夫救鄭而不及楚師當是時也楚之強盛駸駸平有不  
可遏來聘而稱子雖以嘉楚人之慕義實所以傷中國  
之衰微也歟嗟夫楚自莊公之時固已強矣猶幸齊桓  
創伯有以張中國之勢而屈完來盟有以服蠻荆之心  
也宜申獻捷橫逆莫甚使僖公能請于天王而討之以  
繼召陵之績不亦美乎柰何會盟干薄反求楚子以釋  
宋公於是春秋望魯之心絕矣厥後城濮大戰雖有以  
挫其鋒於一時而厥貉次師卒無以抑其暴於他日因  
循至於宣成之時夷夏強弱由是大判盟宋之役晉楚  
之從始交相見而玉帛之使反自由阜達諸鄢郢之都  
矣襄三十年遠罷來聘以報魯侯之朝回視向日越椒  
之不書氏者又何如耶讀經至此太息而止

至順癸酉會試龍虎臺賦

龍虎臺去京師相遠百里在居庸關之南右接太行  
之東地勢高平如臺背山而面水每歲車駕行幸



上都往還駐蹕之地以其有龍盤虎踞之形故名耳  
猗歟太行之山呀雲豁霧結元氣而左蟠於赫龍虎之  
臺摩乾輒坤魁群山而獨尊其背崔嵬突律森岌巒而  
拱衛其勢則昆崙駸駸仰星辰之可捫白虎敦圉而踞  
峙蒼龍蜿蜒而屈盤狀昂首以奮角恍颺興而雲屯其  
北望則居庸巖嶨烟光翠結攢峰列戟斷崖之鐵跋鳥  
飛而不度古木樛以相掣其下視則漲海沖澗飛波洗  
空風帆浪舶往來莫窮想瀛洲之密迹睇三山之可通  
彼呼雁戲馬適足彰其陋而眺瞻望屋曷足逞其雄豈  
若茲臺之不事乎版築而靡靡勞乎土功也想其欽岑  
倚議曼衍迤邐形高勢平背山面水巨靈獻其幽秘歸

邪護其光畧何高華之足吞豈岱宗之可擬此所以通  
光道于上都揭神京之外壘匪松喬之敢登堯桀與之  
攸止也至若四黃既駕西簿既齊方玉車之萬乘蔚翠  
華之萋萋載雲罕與九游光彩絢乎虹霓山祇執誓以  
廣道屏彌洒雨以清埃朝發軔于清都夕駐蹕於斯臺  
明四日以邀覽沛仁澤於九垓眇軒轅之梁甫屑神禹  
之會稽雄千古之盛典又何數乎方壺與蓬萊慨愚生  
之多幸際希世之聖明雖未獲觀斯臺之壯觀敢不慕  
乎頌聲遂作頌曰

傑彼神臺在京之郊金城內阻靈關外包上倚天猊下  
鎮地軸大行為臂滄海為腹崇臺峨峨虎以踞之群山



龍從龍以翼之於鑠帝德與臺無窮於隆神臺與天斯  
同崇臺有偉鸞駕爰止天子萬年以介遐祉

靈棋經解序

昔者聖人作易以前民用靈棋象易而作也易道奧而  
難知故作靈棋以象之靈棋之象雖不足以盡易之蘊  
然非精於易者又焉能為靈棋之辭也哉靈棋之式以  
三為經四為緯三以上為天中為人下為地上為君中  
為臣下為民四以一為少陽三為太陽二為少陰四為  
老陰少陽與少陰為耦而太陽與太陰為敵得耦而悅  
得敵而爭其常也或失其道而耦反為仇或得其行而  
敵反為用其變也亦多則道同而相助陰多則志異而

相爭君子小人之分也陰陽迭用體有不同而名隨之  
異變易之道也易之取象曰車曰馬曰楸曰矢曰龜曰  
孤之類推而天下之物無不該矣曰馬矣而又化  
為龍矣又以為雲變易之義也非通天下之順  
者不為靈棋象易而作也非精於易者不能也  
予每喜其古之驗而病解之者不識作者之旨而以世  
之卜師之語配之故為申其意而為之言若夫以為黃  
石公之授張子房之受則傳無其文史無其實不敢從  
而附會之也

宋景濂學士文集序

太史公宋濂先生金華潛溪人也其字為景濂五歲能



詩九歲善屬文當時號為神童若經若史若子集無不  
徧覽輒能記憶年未弱冠文名播於遐迩至正中詞林  
群公奏為國史編脩力辭不起

大明皇帝定鼎建業丞相李韓公以名聞即日遣者奉  
書幣聘致之俾提舉江南儒學授皇太子經擢居記  
注之職會有詔纂脩元史東南名士一時皆集復

命充總裁官書成入翰林為學士海內求文者項背相  
踵碑版之鐫照耀乎四方高麗日本安南之使每朝貢  
京師皆問安否且以重價購其潛溪集以歸至有重刻  
以為格式者儒林清議多謂國詞臣當推為文苑之  
首誠無間言也先生之著述多至百餘卷

以其門人劉剛復請基擷其精深別成一編庶幾便於  
誦習且徵言序之昔者楚國大司徒歐陽文公玄贇公  
之文曰先生天分至高極天下之書無不盡讀以其所  
蘊大肆取辭其氣韻沈雄如淮陰出師百戰百勝志不  
少懈其神思飄逸如列子御風飄然褰舉不沾塵土其  
詞調雅如殷卣周彝龍紋漫滅古意獨存其態度多  
變如晴躋終南衆皴前陳應接不暇非才具衆長識萬  
千古安能與於此嗚乎文公之言至矣盡矣設使使基  
有所品評其能加毫末於是執今用備鈔冠於篇端而  
并繫先生出處之大畧使讀者有所考焉先生赴  
召時基與麗人葉公琛龍泉章君濫實同行葉君出知



南昌府以歿章君官至御史中丞亦以壽終今幸存者  
惟基與先生耳然皆頽然日就衰朽尚可拂剛之所請  
而不加之意乎雖然先生之文其傳世決矣基亦何能  
與力於其間哉文粹十卷而詩居其一云

誠意伯劉先生文集覆瓿集卷之十四終

